

PAS NAMBA TU PAULO MENI TIMOTIRE GAENUA

Paulo meni Roma nate ena benai sora noko toiro itise duba kapaira be nuso zora awenu giro pas ei awa bua mai nuso Timoti amire gaenua. Timoti nu Efeso dubu amira giti kopi wero noinu giro Paulo meni potai ge eni potiro nu Tuara gera zewai wero nuaise senua.

1 ^{1,2}Na Paulo. Na Yesu Kristora aposolo wero nowena ami pas ei awa mai koko nasu Timoti nimore gainona ewa. Anutu meni Kristo Yesura buara nuai me namorekai potamu seroninua, ami emo nu ara tamai nusora na pumuro aposolo potinu nowena awa. Anutu Mama ata Tua nasokai Kristo Yesura nana ena sogawaire awa-diaire duba-ozaire semu niso nana niro itaise.

Timotira nana tuma diai me itisonua.

³Apiepie nasu nukare duba daimatare Anutu sou i-tupie dowu mai nusokare nane da ago inowena ami kokopai Anutire asinowena. Na be giti pi waiko isara ni kotupitinoise kokopai numore towena. ⁴Nage inadua inoinage ni na emo di sesa amira kotumuro ni noko gosinoise yawa sara bamubake wamu sero yaba inona. ⁵Tuma diai me niso nana itia amira awa kotupitinona. Tuma diai awa apie bama Loisto mia niso Yunis nusoto nana itisonua ami niso nana dai itewia awa gosinona. ⁶Ami emo na kotumai niso awa-uzero sane. Na wana nasu giti nisora potina Anutu meni bua waira putou nimore potinua, awa niao moka pisawenakai nina-ninare kei awinowia ago ine bua waira putou niso nana itia awa weyo kei awae. ⁷Ago inoise ego kotumuyo: Anutu nu Ozana potitinoise burau wanisekai oko potinua. Putoure dubara dumire duba sienaire dai nuanisekai potinua.

⁸Are ni Tua nasokaira oziga sero kerenamu wero me naire oko wase. Noko na nu emo benai ema nona, amira me naire oko nuase. Ni Anutu meni putou potai amira te namore dai Oziga Ewanana emo inoise yayara tame noiyo. ⁹Nune nakai kora wero dubu nuso saramai wanisekai nakai uzumunua. Awa ewanana nasokaira kota, nu nutope ginu itinua, are

dumi yagaba nusora namorekai ago wenua awa. Dumi yagaba awa gita me gita zebu kaka tamamure Kristo Yesura buara namorekai pumunua. ¹⁰Ota zeme meni awa Korawai Ema nasokai Kristo Yesu zebura osenu amire dumi yagaba awa kei damu ninua. Nune betaira putou puro osero baitiro nuai me ewanana itai gege itai awa Oziga Ewanana tugata inoise namorekai kereniro poti damu ninua awa.

¹¹Are Anutu meni na Oziga Ewananara tugata wai ema, o aposolo, o gipai ema wero nuanise potinu nowena awa. ¹²Na ami emo yayara tame nowena awa. Ago inoise me oko nitinowena. Na tuma didinowena numore duba eto oko inowena. Tepo awa. Na ego ine gosinowena: Nu putoure meni bua namore potinua, bua awa te dia inuai be bamu mamunoya awa. ¹³Ge ewanana ni gipena, ge ami ebata patasise sai awa gipinoya, are ge da awa ama ganinoise noiyo. Yesu Kristo tuma didinoise dubara dumi pupinoise ge awa ziro baitiro noiyo. ¹⁴Ozana duba nasokaira nowia ami ni sogawai ge me Anutu meni wana nasokaira potiro dia wanisekai senua, awa saitiro dia wasa niso nana itaise.

Onesiforora ge.

¹⁵Asia provinsra ena dapikarago na doro tepo wewa, awa ninisa awa. Fizeloto Hemozeni nuto dai na dowato awa. ¹⁶Tuara awa-diai Onesiforora dubu amira nana itaise. Mama nusokare meni benai ema namore me kaka namu duba koko waira bua wai gege inoisia. ¹⁷Nu Roma nate kei awero zewai wero na kau inomite tapisia. ¹⁸Tua meni ninai be bamura ena Tuara nana ena awa-diai tamaise. Nu Efeso ena sou bua eto oko wenua, awa nitope gisa awa.

Ni Tuara soldia putoure noiyo.

2 ¹O ma naso, Kristo Yesu meni dumi yagaba nimore pumunua, awa ni puro noise putoure weyo. ²Ema dainirora benaura ena ni bua ge sero gipero awena bua ge awa ema eni ge niniro dimai amira nana ge tugata waira putou itia nukare awa gipasa giro nukare ema eni giparise.

³Ni Kristo Yesura soldia ewanana noise yaya nimore sai awa te dipinoise noiyo. ⁴Zo nu soldia wero nuamunoya ami nogo wero amire tamara bua susu giti awa asumamunoi? Nu giti kopi nuso meni bua nuso gai te waise yaba inowia. ⁵Zo nu otao enire saibore sumamu inoise saiborera potai ge ama ganinoise mai eni dainai amire zuma numore potamunora. Ota nu supinoise potai ge dainamunoya, awa zuma numore oko potamunora. ⁶Zo nu nai bua inoise yaya nuso tamamunoya ami ma awa gita naise sai itia. ⁷Ge tona awa zazaumuro giyo. Tua nune duba niso ziai zazai amire ge tona amira susu giro baitamunosa.

⁸Ni Yesu Kristo kotupitinoise noiyo. Nu Dawidira sibuna meni betaira ena seka wero erinua. Oziga Ewanana nuso tugata inowena ami ago ine

towia. ⁹Oziga Ewanana ami emo inoise yaya bamubake tapinowena. Ago wero pasina mai benago wetera itena ewa. Ata Anutura ge awa oko benisera. ¹⁰Are yaya bua dapikarago awa Anutura seronai dubu emo tamuro dipinoise nowena. Nukare namorege dai Kristo Yesura korawaire simai zasimaire itai gege itai awa dai topetarise ago ine inowena. ¹¹Ge ego ine itia awa me awa,

Betai nusora susumunakai, are nuai nusora
da ago ine susumamunonakai.

¹²Yaya tapinoise kaka tamamu ine wamunonakai, awa numore dai
ema babezinoma wero dia wai bua wamunonakai.

Nu begi wamunonakai, awa nune da ago nakai begi wamunoya.

¹³Sai zewai wai nasokai betata wamunoya, awa sai zewai wai nuso
meni zewai wamunoya. Zo sero zo sero awai awa nuso nana oko
itia.

Gera bua mai Anutu meni gawi ewanana inowia amira ge.

¹⁴Dubu niso meni ge tona awa nuwenai azu, kotumai nusokare awa-
uzeyo. Ago inoise Anutura giti mokara nukare ge puti eni amira ge oko
bawarise se zewai waise. Tani ge puti gege amira ge bawai awa nena
ewanana zo oko tapinowia. Tani ami erama ge bawai ninitinora awa gera
wamunoya.

¹⁵Anutu meni ni gai te waise putoure noise bua niso weyo. Ago inoise
ge me susure kere damu nitinoise nuasa ge ami sonero bayai me nai
meni bua ema niso nana tame oko witaise. ¹⁶Ota ge puti gege amira
gunara ni ge awa tema wero noiyo. Ge puti ami erama Anutura nana
ena uzupitinuai ge nuso doro ebata wayara bayamunora. ¹⁷Ge opi sai
nusokare awa kaka tema wamu wamunosa, awa ge ami boya eya pauniro
bamubake inowia ago ine wero nikare gera wamunoya. Ema ago ine
amira nana Haimenioto Failitore. ¹⁸Nuto ge me doro ego towerato awa,
“Seka wero erai awa emoko kei awenua.” Ago sawerato ema eni meni
tuma diai nusokare besinowera. ¹⁹Ata Anutu meni dubu nuso ibu ine
potinua ami zewai wero dopero itewia. Amira tame owe nuso soya bozai
ine ego itia, “Tua meni dubu nuso gosinowia.” Noko owe zo ego itia,
“Tuara zazo puro nowera nukare dapikarago nuai waya awa azu sarise.”

²⁰Ema waure amira sora ena au-tewa golre silvare meni wai awa gege
kota, ni menita zebu meni wai awa dai itia. Au-tewa eni awa bayau zuma
bamure. Ota eni awa zuma tepo, apaira gegenai awa. ²¹Are zo nu ema
ebata wayara nowera awa azu sero ebata mera nuamunoya ami au-tewa
zuma bamure ine wamunoya. Ago wai sora mama meni nu gawa wero
puro noise ami bua kokopai susu giti wamunoya awa.

²²Mai seka meni nena susu giti amire duba-duba inowera, nuai ago ine
awa azu seyoy. Ewanana waita tuma diaita dubara dumireta begare nuai

awa niso nana ena zamaise zewai weyo. Awa ema duba nusokare saramai meni Tua arugitinowera numorekare dai ago weyo. ²³Dau geta ge puti toise sero niniro awai awa azu sero musuniyo. Amira me awa ge bawai gege kei awinowia, awa gosinowesa. ²⁴Tuara bua ema meni ge bawai azu sai itia. Tuara bua ema meni ema dapikarago otao waise. Nu ge be peure gipaise. Numore waya wara ina tini kapaire oko waise. ²⁵Nu ema ge dai amira kotumai korawamu sero tugata waise. Ago wai duba nusokare kapeteniro ge me giro baitarise Anutu meni ninamunoita? ²⁶Satan meni ge nuso dimarise geta nusora dimunua, awa kotumai zazero besamunora awa.

Be pesunitinuai amire pasina zamamunoya.

3 ¹Ni ego ine niniyo: Be tepo wamu sero inuai amire yaya-buyaya eure-taure kei awamunoya. ²Ema ego ine wero nuamunora: Nukare nukare gege kotupitinoise dagia wero nuamunora; nukare wau moni emo duba-duba wamunora; nukare tama puro wititinoise nutopekare bowi wamunora; nukare Tuare ema enire awa sero isimamunora; nukare mia mamera ge damunora; nukare awa ema eni meni numorekare dumi yagaba pumara ina kokopai oko samunora; nukare Tuare emare awa isa-naisa wamunora; ³nukare dubara dumi tepo; nukare bega tepore, iwo ina-wa wai gege inoise nuamunora; nukare zuzu saire ge busaire nuamunora; nukare tama nusokarera duba-duba wai awa oko puro osamunora; nukare wo gorobare ine wero nuamunora; nukare nena kokopai iwo inoise nuamunora; ⁴nukare otao mamai nusokare awa iwora wanera potamunora; nukare ebata wayara giti agu nuamunora; nukare opi inoise nutopekare gara ema babezinoma wamunoya; nukare Anutu kota zebura nena ara tapinoise nuamunora; ⁵nukare tama meni Tuara ge ninai sao inoise moka nusokare meni gara me amu wamunoya awa. Ago ine awa nuara giro azu sero aike noiyo. ⁶Ema dubu tona amira nana eni meni dubu enira nana saitiro baro bama kotumai tepo awa etetenitinoiwera. Ema ami bama pasinara mou menita tamara duba-duba wai meni kotumai nusokare sisinowia, nukare awa opi ge nusokare ama ganarise etete nitinoiwera awa. ⁷Bama ami be giti ge susu giti ninamu inoise ge me susure amira susu oko giro baititinoiwera. ⁸Gita Zanisto Zambrisre nuto Mosera ge azu sewato, ago ine ema tona awa nukare ge me susure awa azu towera awa. Kotumai nusokare waya, ata tuma diaira ebata gipinoiwera awa opi gege awa. ⁹Zanisto Zambrisra opi kei damu ninua, da ago ine opi nusokarera susu kei damu nai ema dapikarago giro tepo wamunora. Are bua nusokarera me oko bamu wamunoya.

Zewai wero Tuara ge puro nuai amira wini ge.

¹⁰Ata nine meni awa te esa naso patiro nowesa. Ni ge tugata wai naso, nuai naso, bua wai naso, tuma diai naso, awa-diai naso, dubara

dumi pumai naso, zewai-zawai wai naso, ¹¹ iwora yaya-buyaya naso, amira ebata patitinoise na ama ganinowesa. Antiok nateta Aikoniam nateta Listera nate ena na dero kaputiwa yaya borere bamu tamuna awa gosinowesa. Ata Tua meni saineba yaya dapikarago amira soe ena na soenua. ¹² Zo nu Kristo Yesura nana deseniro gera ebata patamunoya, awa nuso nana dai iwora yaya kei awamunoya. ¹³ Ata ema wayata etetenai ema nukare ami ema eni etete nawera ina etete nawera ago wero susauma waya wero baitamunora. ¹⁴ Ota nine meni awa ge me susure nimore gipai awa ziro tata-tata inowesa, ge amira deseniro noiyo. Ge ara nana pumusi awa oko kau inosa. ¹⁵ Susu ei dai giro baititinowesa awa: Ni mai moruare Tuara ge saramai awa azimuro niniro awi-tupise nowesa. Ge ami duba nasokai zasimai Kristo Yesu tuma didinoise kora wai te tamamunonakai, amira putou awa ge buku saramaira nana itia. ¹⁶ Tuara ge gayai dapikarago awa Tuara Ozana meni kereninu gaewa kei awenua awa. Ge ami ge me susure nakai gipinowia, ata potai ge potitinowia, ata nakai sero kora wero awinowia, ata nakai etutiro nuaira ebata gipinowia. ¹⁷ Nakai Anutura ema dubu meni bua kokopai susu giti te wero baitanisekai ge gayaira putou ago ine itewia.

Ni Tuara ge me kerenitinoise noiyo.

4 ¹ Kristo Yesu noma kei damu niro Tua bamu wamunoya. Ago inoise betaire seka nuaire ge nasokai sai tepo wamunoya. Ami emo na nuso nana giti mokara ata Anutura nana giti mokara sana niniyo. ² Ni Tuara ge tugata wero baiti. Ago inoise ema gera yaba wamunorita kaka wamu wamunori, saineba, zewai wero tugata weyo. Ema duba kapetenarise sero ge meni moka nusokare gayase; waya nusokare giro senamunosa; Tuara ebata me patarise awa-uzamunosa. Ago inoise gipai bua niso berea tepo inoise noiyo. ³ Noma be zo mai amire erama ge ewanana ninaira biawa wai giro duamunora. Nukare ge ewanana doro ge ewe zo ninarise wama beregi-beregi wai giro gipai ema eni sianiro pumara ge ewe yaba inowera awa te gipinuamunora. ⁴ Ago inoise Tuara ge me awa poti gutipe niro opipira uge amira desenamunora. ⁵ Ata nine meni awa be giti kotumai niso ziyo zewai-zawai wai nuase; yaya-buyaya niso nana tame witai zewai weyo; Oziga Ewanana tugata waira bua inoise noiyo; bua ge nimore sai awa wero baitiyo.

Paulo bua nuso pesunaira be zora awenua.

⁶ Pris ema zame potai bua nusokare inoise akou ou wainre zo awa zame ine Anuture potamu sero kaka-kaka zozinoma bua pesuniro amire agewa dago zozawera tepo inowia, ago ine nuai naso meni tepo wamu inoise inoya. Utura bayaira be naso zora awinoya. ⁷ Na saibore me supinoe pesunitinoise Tua meni tani naso potinua amira kei awinona.

Oziga Ewanana tugata waira bua namore sai awa wetena te wero baitisia awa. ⁸Are ema saramaira giti simaira nena namore asero woi wai itia, awa noma be bamura ena Tua naso nu zas bua me gege wamunoya ami namore potamunoya. Awa namore gege kota, kei awai nusora yaba inoise nowera numorekare dai potamunoya awa.

Pesunaira ge.

⁹Ni awita sero naso nana eya mu. ¹⁰Dimas nu zebura nenara yaba inoise na doru Tesalonika nate bamisia. Kresens nu Galata bamisia, ota Tito nu Dalimesia zebura bamisia. ^{11,12}Tikikas awa iyetena Efeso nate bamisia. Luka imata namore dai nowia. Mak tamuro sero eroma muwoto. Nu buara te na soremamunoya. ¹³Mamu noma giro tama sawai naso Troas nate ena Kapasra sora dotisena, awa puro muyo. Ago wero buku naso pepa meni wai awa pupinoise buku wo tata meni wai awa oko nuwenase. Awa dai dapikarago puro mu. ¹⁴Alesanda nu ema bras meni nena wai ami namore tani waya dainiro wenua, are noma Tua meni amira ina numore potamunoya. ¹⁵Ge nasokare dainiro puro osenua, are ni nitope nu uma wero baitiyo. ¹⁶Koto bua naso gita kei awisia be amire otao zota zo meni gera na oko sorepisia. Tepo awa. Nukare dapikarago na dotisera awa. Pasina nusokare awa Anutu meni oko kotumaise! ¹⁷Ata Tua meni awa nune ge nuso tugata wero pesunana ema Yudako dapikarago nukare niniro tepo warise naso nana muro na sogawero zi zewai wero ge tugata wetena ninisera. Ago inoise wo layonra bera ena na soero pupisia awa. ¹⁸Tua nu na nena waya bamubamu dapikarago amira nana ena soero pumuro utura mokara potamunoya. ¹⁹Na Priska ata Akuila ata Onesiforora mai awiso nukare arenitinona, awa se gare. ²⁰Erasto nu Korinti nate ena dona itewia. Ata Trofimo nu yaya pumunu giro Mailitas nate ena dona itewia awa. ²¹Ni ewa eraira be kaka mamure eya muyo. Yubulas meni ni arenitinoya. Ota Pudena ata Lainas ata Klodia ata otao mamai dapikarago nukare da ago nima arenitinora.

²²Tua meni ititi nisore dai nuaise. Tuara sogawai meni nisokare nana itaise.